



Nuuk, 26/5-2020

Inatsisartut suleriaasianni § 37 imm. 1 naapertorlugu Naalackersuisunut apeqqut imaattoq matumuuna saqqummiuppara:

Naalackersuisunut apeqqut:

1. **2020-imi angalaniaat nunaqavissut Covid-19 patsisaalluni qassiusimappat Air Greenland-imiit billetsiminnik utertitsiniaasut?**
2. **Air Greenland-imut qanoq akeqassava 2020-imi angalanianut nunaqavissunut billetit aappaluttunut aningaasat utertitassat tamakkiisut utertissagaanni?**
3. **Air Greenland Nunatta Karsianiit aningaasat qanoq annertugisut pissarsiarai, Covid-19 pillugu Naalackersuisunut isumaqatigiissutit malitsigisaannik?**
4. **Nunatta Karsianut qanoq akikinnerutigiva Air Greenland atuinnaallugu Danmark-Kalaallit Nunaat akornanni, angallavik tamanut ammaannarnissaannut sanilliullugu?**
5. **Naalackersuisut pilersaaruteqarpat Kalaallit Nunaannut timmisartukkut angallasserit pisortaniit tapiissuteqarfigineqarunnaarnissaannut?**
6. **Kalaallit Nunaannut timmisartuussineq eqqarsaatigalugu, timmisartuutileqatigiinnut allanut akuersissuteqassalluni sunik periarfissaqarpa, Air Greenland atorunnaarlugu?**

(Inatsisartuni ilaasortaq, Pele Broberg, partii naleraq)

Tunngavilersuut:

Soorlu tusagassiuutitigut ersersinneqaleraluttuinnartoq, Naalackersuisut aalajangersimavaat Air Greenland kisermaassilluni aqqutinut aalajangersimasunut atorniarlugu.

Ajornartoorfimmi matumani atsaat taamak pingaaruteqartigilerpoq piffissaagallartillugu innuttaasut aningaasaqarniarnerat peqqissaartumik qulakkiissallugit, tamannalu pissutaalluni Naalackersuisut innuttaasut aningaasaataannik pikataasumik pinninnerat soorunami tusagassiuutini ukkatarineqarput.

Air Greenland pisiariniarneqalermat tunngavilersuutit paasineqarluarsinnaasut ilagisimavaat, Ingerlatseqatigiiffik tamakkiisumik nakkutigineqalersinnaammat, Ingerlatseqatigiiffiup kalaallinit inuiannit pigineqarmat.

Massakut killiffimmi erserpoq tamanna sunniutigineqanngitsoorallartoq, innuttaasummi angalanissaminnut ernumasut billetsitik utertinniarsaralugit Ingerlatseqatigiiffimmiit paasineqarumasimangillat.



partii naleraq

Nunatta Karsia annaasanut taamaattunut taarsiuteqassappata, taava aningaasat pineqartut ersariffaarittumik annertussusaat paasissallugit pisariaqarpoq. Tusagassiuutitigut sammineqarnerani paasinarsivoq qinikkat nuimasut ilaat angalasimasoq sumiiffimmi angalaniarnikkut isumaqatigiissuteqarfiusumi naak angalanissaa pisariaqavinngikkaluartoq. Ilanngullugu paasissutigineqarpoq aamma pisariaqavissumik angalaniartut sumiiffimmi tassani nammineq akiliillutik angalasartut, naak Air Greenlandimut ilaallutik Danmarkiliartut tamarmiusut pisortat akiligaannik angalasimasut. Pisariaqartillugu angalaniat sullissinermut isumaqatigiissuteqarfiusumi nammineq akiliillutik angalasut ersarivissumik akuerineqarsinnaangilaq, illuatungaanilu pisariaqavitsillugu angalaniat allat sullissinermut isumaqatigiiffiunngitsumi akeqanngitsumik angalasimasut.

Tamanna pillugu innuttaasunik sullissinermi sunik akiliutigineqarsimanersoq paasitilluassallugit pisariaqarpoq.

Angallassinermut inuussutissarsiortut tamarmik Covid-19-imit ajornartoormi annertuumik eqqugaapput, tamannalu ersersippaa Ingerlatseqatigiiffiit arlallit angallassinermi annertuumik pisinnaasaqartut, soorlu ilaatigut Danmarkimi. Tamannarpiarlu patsisigalugu sullissinermik akikinnerujussuarmik tunisisinnaanermik periarfissiisoqarluni, tassungalu tunngatillugu pisariaqarpoq paasiniassallugu Air Greenland qanoq akikinnerutigisimanersoq, Kalaallit Nunaata Danmarkillu akornanni timmisartuussisartussatut toqqagaammat ilaatigut Islandimi aqquataani mittarlutik.

Qulaani eqqartorneqartoq aamma periarfissiivoq timmisartuussisartut pitsaanerpaat akikinnerpaallu toqqarnissaanut taakkuami ilaasunut ajunnginnerpaamik utertinneqarsinnaasunillu billettseqartitsisinnaammata, pisortaniit tapiissuteqaratik. Taamaliorniaanni pisariaqarpoq timmisartuussisartut allat qanoq akeqartinniarlugu neqeroorteqarsimasinnaanersut.

Ullut suliffiusut qulit qaangiutsinnagit akisoqarnissaa kissaatigalugu.